









INAUGVRATIO

33.

L. VDOVICI XIII.

GALLIARVM ET

NAVARRÆ REGIS

Christianissimi.

*Ad Illustriss. Cardinalem, D. D. IACOBVM  
DAVY DV PERRON, Senonum  
Archiepiscopum, Gallia & Germanie  
Primates, magnum Francie  
Eleemosynarium.*

Auctore NICOLAO BORBONIO.



LVTETIÆ,

Ex Typographia ROB. STEPHANI.

Prostant in officina P. CHEVALIER,  
in monte Diui Hilarij.

M. DC. XI.

*Cum privilegio Regis.*

4775

Case

F

39

.326

161160

THE MITCHELL  
LIBRARY



*Illustrissimo Cardinali D. D. IACOBO DAVY  
du PERRON, Senonum Archiepiscopo,  
Gallia & Germania Primate, magno  
Franciae Eleemosynario, &c.*

S.

**M**EMINI me legere ( Cardinalis illustrissime ) Dictatorem Syllam, malo & plebeio poëte, qui ei versus obtulerat, statim præmium iussisse tribui, sub ea tamen conditione, ne quid postea scriberet. Tu omnium artium & disciplinarum, principisque Academiae Dictator, sed longè humanissimus, cum nuper illustrissimum nomen tuum exili poëmatio præposuissem, meam non valde scelicis ingenij operam laude & præmio carere noluiti, neque in posterum mihi eiusmodi scriptione interdixisti. Quo ego successu, & beneficio tuo inuitatus, aliquantò longius in eodè argumento progressus sum, simul ut ipse mihi obsequeretur, qui LUDOVICO Rege nostro indicto penitus, aliò scilicet abripiente me, ex patris casu, dolore, parùm animo meo satisfecisse videbar. Enimvero in eius commemoratione inuitus

feci vt deplorandã historiam denuo attingerem, & tristia lætis miscerem, quo etiam nomine fortasse reprehendar. Sed ea profecto est fortuna Gallia, vt hæc sine illis intelligi non possint : atq; vt multa deinceps secunda & læta Gallis obueniãt, quod spero & opto: tamen nimis recens hoc vulnus semper futurum est, nec alioqui ex eorum numero sum quibus admodũ placet illud obliuisci. Tibi verò (ô magnum seculi decus) qualecunque hoc opus est, non tam nouum nuncupo, quàm tuum reddo, qui diuina auctoritate & fauore, iacentes ac intermortuas Musas excitãris. & sanè cum his alijsq. omne genus litteris æstimandis omnium mortalium maximè idoneus & sis & habearis, longè gloriosissimũ sibi ducũt litterati homines iudicium tuum aliqua ex parte promereri. Mihi verò, qui nihil tale sperare ausim, quẽmquẽ vix vlla mediocritas commendat, satis erit vnica tua beneuolentia, cui si litauero, ego qui iam tibi nimium quãtum debeo, etiam animam & salutem sum debiturus. Vale, Lutetia VII. Calend. Nouemb. M. DC. X.

*Tuæ Celsitudini deuotissimus & deuotissimus cliens N. B O R B O N I V S.*





INAUGVRATIO  
LVDOVICI XIII. GALLIA-  
RVM ET NAVARRÆ RE-  
GIS CHRISTIANISSIMI.



VNT etiam Superi, nec inexorable  
cælum  
Assiduis Gallos exercet luctibus:  
astra  
Indulgent nostris iam conciliata que-  
relis.

Et nos extincto miseratus REGE, sub vndas  
Fugit, & horrentem tristi caligine vultum  
Quinque dies, toto ostendit sol luridus Orbe,  
Atrâque sollicitas texerunt nubila terras.  
Necnon illacrymans indignis casibus æther  
Insolitum densis fudit de nubibus imbrem,  
Quo largi creuère amnes, quo Sequana totis  
Intumuit ripis, & lapsus in æquora cursu  
Præcipiti, tanto de funere nuntius Arcton  
Perculit, extremaeq; gementia littora Thules.

Ergo secuturas populus dum peruigil Idus  
Horret, & insomnes per opaca silentia curæ  
Exagitant animos, lacrymæ vndiq; & vndiq; terror:  
Indigetum è cætu casum LODOICVS, & urbem

A

I N A U G U R A T I O

Adspexit, chari corpúsq; exangue nepotis.  
 Extemplò patrius mentem dolor occupat: & cui  
 Tantùm (ait) in nostrum licuit genus? vnde meorum  
 Confossum latus, & crudelia vulnera cerno?  
 Méne petunt etiam pestes, & peruia monstros  
 Nescius astra colo? Nec plura effatus, ab axe  
 Emicat Heróum, niuei quà semita lactis  
 Albentem in sulcum glomeratos porrigit ignes:  
 Vtq; nihil tardatus erat iam mole caduci  
 Corporis, implicitos per tot se sustulit orbés  
 Ocyus, ardentiq; super consédit Olympo.

Híc residens, altis rerum molitur habenas  
 Terrarum cælique Sator: micat æthere puro  
 Regia, librati surgens in vertice mundi,  
 Quadratóque immota situ, quam numine complet,  
 Maiestate ingens: hinc atque hinc flammens Ales  
 Iussa facit, solérsque suo Natura ministrat  
 Authori, solóque Elementa cadentia nutu.

Ad quem tum supplex L O D O I C V S talia fatur;  
 Multa querens, casúque animum perculsus acerbo.

Maxime regnator Diuúm, qui fulmina torques,  
 Sub pedibúsque premis terras, sedésque silentium:  
 Quid me cælitibus, vanum largítus honorem,  
 Annumeras? & sydereis accedere templis  
 Nequicquam concedis, agunt si immitia fata,  
 Et mea mortales carpunt præcordia curæ?  
 Si terris viles sumus, & res Gallica nullam  
 Sentit opem, tuáque heu! nostros tutelá nepotes  
 Destituit? méne hæc, genitor, sperare iubebas,  
 Cùm sceptrum mortale, tui, tot adire labores  
 Nominis egit amor? cùm me, tua gloria regno  
 Atque anima potior, caput obiectare periclis

Et petere ignotas suasit trans æquora terras ?  
 Europâque Asiâque tuos arcere rebelles  
 Infidum genus , & longinqua laceffere bella ?  
 Hic quamquam infelix fortunæ cedere virtus  
 Iussit , & aduersis tentavi plurima fatis ,  
 Me tamen angustis victrix patientia rebus ,  
 Et pietas , ingensque tuæ fiducia dextræ  
 Firmabat , tunc cum captiuo vincula collo  
 Barbarus iniécit , nostrâ cum strage Canopus ,  
 Et septemgemi rubuérunt flumina Nili ?  
 Nec Pelusiæ me cedere mœnibus hostis  
 Contentus , nomen furiata mente iubebat  
 Eiurare tuum , atque aris adolère nefandis ,  
 Nî facerem , ferrum capto intentabat . & ignes .  
 Sed nullæ fregère minæ , nullóque timore  
 Nutauit labefacta Fides , quam propter , ab axe  
 Occiduo , ad rubras penetraram Doridis vndas ,  
 Tot maria emensus , tot inhospita littora classi ,  
 Horribilémque luem , & populantes agmina morbos  
 Passus , & hibernos cæli pelagique furores .  
 Pro qua , certus eram victrices denique lauros ,  
 Inter inaccessas Libyæ squallentis arenas  
 Quærere , & insignem domitâ Carthagine mortem .  
 Quid tot bella iuuant exhausta ? senisque cruentas  
 Arfacidæ fugisse manus ? si vulnera tandem  
 Impia , si nostrâ ductos ab origine Reges ,  
 Inuisos fatis heu ! sors miseranda manebat ,  
 Percussore peti , diróque occumbere letho ?  
 Hiccine nunc pietatis honos , hæc præmia nobis ?  
 En etiam orba viro coniux , tria pignora celo  
 Ostentat lacrymans , Mater factura vel ipsis  
 Inuidiam Superis : en nostri nominis hæres

I N A U G V R A T I O

Imperio venit, & patrijs succedere curis  
 Pene infans gemit, ac tantas detrectat habenas:  
 Heu nimium insidijs ætas obnoxia! quis nunc,  
 Quis rectore suo vacuum moderabitur Orbem,  
 Aut desolatas Luparæ tutabitur arces,  
 Omnem si nostri posuisti è pectore curam?

Talibus orantem L O D O I C V M, & sidera questus  
 Implentem, cæli rerumque æterna potestas  
 Exceptit: Superum dicturo exercitus omnis  
 Attremittit, & tota nutat compagine mundus,  
 Tum sic venturis soluit non irrita fatis  
 Ora Deus. Non vlla mihi, L O D O I C E, recessit  
 Cura tui generis, vanis absiste querelis;  
 Nec me tantarum capiunt obliuia rerum  
 Quas Oriens, medium quas Sol euectus in Orbem  
 Vidit: adoratæ cum te pius ardor Idumes  
 Impulit, & regna Ægypti temerata profanis  
 Ereptum dominis, Libycosque accedere portus.  
 Stat meritis æternus honos, tua didita cælo  
 Gloria, & in feros regnum immortale nepotes  
 Mansurum: sed enim quod lamentabile funus,  
 Et sparsas iterum cognato sanguine terras  
 Conquereris, non hæc iniuria nostra, nec istud  
 Non vetuisse, Dei est crimen, dat libera cuique  
 Fata Deus, propriisque fluunt mortalia causis.  
 Magnanimus princeps cæco seruire timori  
 Indocilis, dum nulla alienum hausisse cruorem  
 Sæuitia memor, ipse suum non credit ab vllâ  
 Peste peti, & longè stipantia submouet arma,  
 Et quem scit meruisse hominum confidit amori,  
 Insidijs patuit: quo tempore Punica debet  
 Inuenta, & diras horrescere cautior artes.

Non alijs fuerat caput hoc superabile telis.  
 Vidi ego percussum cadere, indoluique cadenti,  
 Et vix vltices compressi ex æthere flammæ:  
 Sed veniet tempus, cum fraus & operta patebunt  
 Crimina, meque suo gaudebit vindice Gallus.  
 Intereâ solare animum, tantique doloris  
 Desine: namque omnis fatorum hac morte resedit  
 Consumptus furor, & melior fortuna sequetur.  
 Ille puer, cernis? varij quem conditor anni,  
 Exacto nondum nouies Sol orbe salutatur,  
 Iura dabit terris, referens & sæcula genti  
 Aurea, pacata fœlix adolescet in aula.  
 Sed mater, refugit nati quæ mollior ætas,  
 Imperij curam delatâque fræna capesset,  
 Virtute atque animis præstans Regina, nec illa  
 Inferior, quæ te, L O D O I C E, impubere regno  
 Extulit, hæc patres generoso sanguine Thuscos,  
 Augustos à matre refert, aquilâsque potentes  
 Cæsareæ monimenta domus, nec moribus vlla  
 Sanctior, aut nostris supplex aduoluitur aris  
 Sæpius, hæc lapsis succurret Fœmina rebus.  
 Tum motus populorum, insanâque bella verabunt  
 Vnanimes regni proceres, fortisque Senatus.  
 Prima fidem, & non obsequium violabile, cunctas  
 Exemplo tractura suo Lutetia gentes,  
 Præstabit Regi: tum quas vtrunque recuruis  
 Ambit littoribus Gallorum Nereus vrbes,  
 Quâsque procul rapido descendens amne Garumna,  
 Et Rhodanus, Ligerisque vagis interluit vndis,  
 Conuenient teneros certatim agnoscere nutus  
 Principis, accipientque iugum ceruice volenti.  
 Ipse truces longè Mars indignatus adibit

I N A V G V R A T I O

Bistonas, & lata Gallos in pace perosus  
 Insanum fremet, atque minas iactabit inanes.  
 Verum ubi se primo decorarit flore iuuenta,  
 Addideritque animos & adultis robur ab annis,  
 Otia tum rumpet patriæ **L O D O I C V S**, & altis  
 Assurgens ausis, resides in bella mouebit  
 Franciadas, iam barbaricas mihi fulminat arces,  
 Iam premit Eoum signis victricibus Orbem,  
 Et quæcunque olim magno pietatis amore  
 Ausus eras, toties nolentibus irrita fatis,  
 Implebit victor, peragetque ingentia cæpta.

Sic ait, atque Crucis quassans venerabile signum,  
 Per domitos Manes & caligantia regna,  
 Perque triumphatæ pallentia limina Mortis  
 Annuit, & toto Ditem tremefecit Auerno.

Nec mora, cum volucres cursu properare ministros,  
**H E N R I C I Q V E** animam venientem sistere cælo  
 Imperat: illa alacris, sed vulnere tardior ibat,  
 Heroum rimata viam sedesque beatas.

Ilicet aërio lapsi per inane volatu  
 Occurrunt, fessamque leuant, chorus affonat omnis  
 Semideum, & plausu mediam deducit ouanti,  
 Syderibusque locat, humiles vnde ardua terras,  
 Et pelagus, subtérque meantia flumina cernit.

Hic pater abstersit lacrymas **L O D O I C V S**, amicis  
 Letatusque Dei fatis, & honore suorum.

Atque ea suprema mundi dum parte geruntur,  
 Concussas late bacchatur Fama per vrbes,  
 Horrendumque nefas primò vix credita portat,  
 Vtteriora petens: & adhuc sub nocte silenti,  
 Pallida turbatis irrumpit nuntia castris,  
 Hinc quæ Mosa tuos, hinc potant Matrona fluctus.

Nam quã fertilibus latè Campania glebis,  
 Inter vicinos tellus se porrigit amnes,  
 Constiterant acies: altaque in nocte micabat  
 Ære renidenti regio, Germania bellum  
 Dum parat, & socijs dubius Mars errat in armis.  
 Tum verò exarsit nostris dolor: impete cæco  
 Authorem sceleris per apertum cladibus Orbem  
 Fert animus reperire, & fontes voluere terras.  
 Quod ni summa ducum facundia, militis iras  
 Temperet alloquijs; rupto iam fœdere mundi  
 Scœurent odijs accensa furentibus arma,  
 Et gemeret fusos Eurôpa cruoribus amnes.  
 Vt cum prolapsus de montibus, obice torrens  
 Naturæ stetit, aut operis, fremit vndique circum  
 Oppositas moles, atque indignata teneri  
 Vnda minax, rapido assultat violentior æstu,  
 Aggere mox rupto in campos ruitura sonantes.  
 Sic animis altus scœuit furor, auribus & iam  
 Non vllos monitus solatiæue vlla morantur;  
 Ter subijt totis conuellerè signa maniplis  
 Impetus, externisque ignotum finibus hostem  
 Quærere, ter vetuere dūces, iraque, repressis  
 Ardentes micuere oculi, & scelus vnde nefandum  
 Suspectantue dolos, huc rauco murmure longas  
 Intonuère minas, horrendusque impulit Alpes  
 Armorum fragor, & Morinos Rhenūmque bicornem.  
 Hic vetus, emeritis & non inglorius annis  
 Signifer, HENRICI fortunam & bella secutus  
 Per varios casus: tanto sub Principe longam  
 Militiam & graue Martis opus, qui sæpe feroci  
 Lactarat fastu, cui foffum pectus honestis  
 Vulneribus, tornoque ingens sedet ore cicatrix;

I N A V G V R A T I O

Non tulit hoc animo vulnus, sed protinus irā  
 Atque dolore amens, socijs spectantibus vltro  
 Infelix signum & damnatam proijcit hastam,  
 Noctemque stellasque & euntia lumina Phæbes  
 Incusans, surdo facit hæc conuicia cælo.  
 O Dii crudeles, & diri conscia casus  
 Sydera, non faustos vibrantia desuper ignes,  
 Quid struitis? quidve has inimico lumine terras  
 Figitis, inuisam iurata excindere gentem  
 Gallorum? at nullo meriti hoc errore, nec vlla  
 Crimina, sed vestram, quæ pascitur atra cruore,  
 Inuidiam luimus, nimio plus creuimus, & vos  
 Iam pridem nostræ ceperunt tædia laudis.  
 Quin agite, humanis si finem ponere rebus,  
 Atque odium satiare placet, librate corusca  
 Fulmina, concusso miscete incendia mundo,  
 Amisso iam nulla timet dispendia Rege,  
 Et iactura leuis reliqui: iam parcere nobis  
 Crudele est, omnes vno quin sternitis ictu?  
 Dicite. sed nostras nullo dignata querelas  
 Murmure prætereunt, cæloque inuecta silenti  
 Luna fugit, tacitis properans se condere bigis.  
 Ast HENRICE iaces immitis victima fati,  
 Prò scelus! & nil iam debes cælestibus vllis,  
 Et Virtus ignaua videt? secura pudoris  
 Sustinet hoc Fortuna nefas? cur perfida quondam  
 Te prope cæruleæ pignantem Tethyos arua  
 Hostibus explicuit medijs? cum fulmine dextræ  
 Hinc maris Arctoi fluctus, horrentiaque illinc  
 Arma eluctantem stupuit Neptunus, & ipsos  
 Allabi pelago stagnantes sanguine campos?  
 Cur per Santonicas acies, & stragis acervos,



Per tot Iberorum cumulata cadauera latè  
 Victorem duxit Regem ? laterique verendo  
 Formidata diu mortalibus , induit arma ?  
 Quæ Belga, & totis horreret Sequanus aruis ?  
 Siccine vt infami te proderet impia monstro ?  
 Incoctaque Erebo Furiarum cuspide , tantus  
 Oppeteres, nulli ferro penetrabilis hosti ?  
 O vtinam, qui tantorum pars esse laborum  
 Tunc memini , & pugnans ipso te vulnera teste  
 Accepi , medio cecidiffem puluere victor ,  
 Extremumque decus præclara morte tuliffem !  
 Nam quid ego infælix te decedente supersum ?  
 Cur patriæ clades oculis & dedecus istud  
 Haurio ? sed præstat crudelem abrumpere vitam  
 His manibus ; iam non Rex incomitatus abibis ,  
 Te sequor. ( hæc dicens sæuum recluserat ensem  
 In pectus ) socij inuadunt , ferrumque furenti  
 Eripiunt , atque his castigant vocibus vltro :  
 Degener in mortem ruis , & perferre dolorem  
 Non potis immensum festinas funera ? quin te  
 In sortem patriæ , & communia fata reseruas ?  
 Huic animis opus est nostris , huic pectore, forti .  
 Ille refert : Non quòd cæli hoc spirabile lumen  
 Inuitus linguam, aut vitæ dulcedine captus  
 Obsequor, ô socij, nec adhuc superesse recuso .  
 Sed Regis regniq;ue salus , nunc viuere iusso  
 Clamat , & insanum reuocat mihi mortis amorem :  
 Iam quodcunque animæ superest & sanguinis , vni  
 Seruatur , L O D O I C E , tibi , tua sceptrâ tueri ,  
 Et quem supremum genitori ferre laborem  
 Sperabam , nato certum est impendere , nulla  
 Otia iam quæro , aut patrios veteranus arare

I N A V G V R A T I O

Lentus agros, segnive armis procul esse senectâ,  
 Stans moriar. nos hæc socij iuremus in arma  
 Ultiores diri sceleris quocunque futuros  
 Tempore, nec fuscis passuros lilia Mauris  
 Alba premi, Francumve dolis abolescere nomen.  
 Dicentem sequitur clamor, cunctique paratas  
 Ostendere manus, densumque horrentibus hastis  
 It nemus: hinc fausto LODOICVM nomine castra  
 Ingeminant, pulsi referunt ad sydera colles.

Interea surgens humentia dispulit astra  
 Phæbus, & attonitis iterum mortalibus almam  
 Eoo tulit axe facem, quæ turbida quamvis  
 Hesternum execrata nefas, dum terra tenebris  
 Damnari timet æternis, gratissima fulsit.  
 Exoritur nobis Lupara LODOICVS ab alta,  
 Ceu quondam irato deprensus æquore nautis  
 Sydus Amyclæum supra caput astitit: omni  
 Natiuum formæ Maiestas prima decorem  
 Auxerat, & viuos oculis afflarat honores,  
 Exstantemque repentè humeris, totoque videri  
 Corpore maiorem, & radiantia fecerat ora:  
 Atque hunc, aduersæ residens in margine ripæ,  
 Augustam, aurato solio expectabat, ad ædem  
 Diua Themis. circum proceres comitantur euntem,  
 Sublimemque in equo, pedites, sine more, profundum  
 Testati obsequium, demissaque pectora Regi.  
 Continuò sonuere tubæ, super aurea clamor  
 Astra, salutantum, & studijs votisque sequentum  
 Undique sublatus, lateque remugijt æther.

Est domus, è medio quæ pendula gurgite surgens,  
 Defixis altum arboribus libratur in amnem:  
 Subter agens torquet scandentes machina fluctus,

Tergeminisq̄ue illisa rotis immurmurat vnda.  
 Nympharum dulcis sedes, vbi nocte diēque  
 Naiadum vitreā ludunt examina pompā,  
 Effunduntque lacus, centumque canalibus vndam  
 Desuper inspergunt ponti, qui iungitur illis  
 Proximus, atque ambas coniungit marmore ripas.  
 Hæc vbi Rex alacer gressum tulit, vna dearum  
 Affata est, leni fundens hæc verba susurro:  
 Progredere ō Diuum genus, & spes vnica rerum,  
 Sol oriens terris, cui tempestatibus actam  
 Concedunt patriam tranquillo sistere portu  
 Numina, & obstantes depellere lumine nimbos:  
 Sis fœlix, & per populos des iura volentes  
 Longæuus, iustisque regas sub legibus Orbem.  
 Hæc Nympha, & placido lapsu se reddidit vndis.  
 Iamque ferè mediū ventum ad diuortia pontis,  
 Extrema angustas vbi traicit Insula metas,  
 Hactenus & bifidum tellure interfecat amnem:  
 Cùm pater vndarum, Geniūsq̄ue apparuit ingens  
 Fluminis, ora suis attollens scrupus antris  
 Sequana; limosæ salices huic tempora circum  
 Surgebant, & glauca caput velabat arundo,  
 Multus arenoso sub pectore stridulus ibat  
 Calculus, & grandes rorabant imbre lacerti:  
 Ipse canis haustum terrarum hinc inde latebris  
 Humorem, & plena fluuium fundebat ab vrna.  
 Vtque propinquatē L O D O I C V M sensit, & omnem  
 Intremuisse vadis sancto sub pondere molem:  
 Leniter aduertit vultus, magnūque futuris  
 Os aperit, venerans. O formosissime Regum,  
 Rex, ait, immensi quem spondent fata potentem  
 Equoris, & generum Tethys emet omnibus vndis.

I N A V G V R A T I O

Tethys nota mihi: Sanctis ô edita salve,  
 Progenies atavis, cuius se tollit in astra  
 Nobilitas, altóque ciet gentilia cælo  
 Numina, possessos natis seruantia Gallos.  
 Hæc quæ prædixit Rhenus, dum gurgite fertur  
 Obuius, & pelago communes iungimus vndas  
 Accipe; ne bello cæptisque instare paternis  
 Rex dubites, Francis Germania postulat armis  
 Defendi, atque tuum libertas nomen adorat,  
 Da socijs arma atque duces, promissaque mitte  
 Auxilia, hæc facili virtus sua limite ducet,  
 Omnia prona viris, nec eos obiecta tenebunt  
 Flumináve aut montes aut inuia lustra ferarum,  
 Vincet iter, prædulce decus laudúmque cupido;  
 Obuia iam pandunt tremefactas oppida portas,  
 Cliuiáque, & dubijs nutat tibi Iulia muris.  
 Hæc vrbs, indigenæ si vera oracula vatis,  
 Mœnia celsa tuis submittet viribus impar,  
 Terrifico deiecta fragore, tuámque sequetur  
 Capta fidem, & dominos dignabitur ardua Gallos.  
 Talia voluebat melioris Sequana fati  
 Conscijs, & restuis L O D O I C O plura parabat  
 Vocibus, ille cito transfuectus flumina cursu  
 Augustæ Themidis successit sedibus ingens.  
 Híc omnis radiavit honos, híc vtraque fulsit  
 Purpura, Romanos quæ mundi lumina patres  
 Concilium æternæ Sedis, procerésque Quirini;  
 Quæque sacerdotes Themidis decora alta Senatus  
 Velat, & ardentem humeris inuoluit amictus.  
 Pauca serenato demum Rex inchoat ore,  
 Spémque animis addit dubijs, pellitque timorem.  
 Tum dea facundo surgens interprete fatur,

Eloquentiæque tonat: tenuere silentia passim  
 Attoniti proceres, teneris Rex auribus hausit  
 Mellea declivi stillantia flumine verba,  
 Et sanctos monitus præceptaque condidit alto  
 Pectore, nec nobis fas hæc æquare canendo,  
 Nec leuibus numeris tam docta reteximus orsa.  
 Illa Patris patriæ casum miserata ciebat  
 Principibus lacrymas, vicinaque flebile templa  
 Reddebant murmur; simulacraque mæsta per aras.  
 Altiùs hinc repetens, vt cælo lapsa, docebat,  
 Maiestas omnem sub leges miserit Orbem,  
 Atque homines certis parere coegerit olim  
 Imperijs, sanctos vt fecerit vnica Reges  
 Iustitia, & summo superis æquarit honore:  
 Iustitiæque super Pietatem Gallica sceptrâ  
 Addiderint, pulcros virtutum nacta duarum  
 Conventus, longisque adeo florentia seclis.  
 Tum quoque magnorum Regi memorabat auorum  
 Exempla, & geminos ab eodem nomine Reges  
 Promeritos claras cæloque soloque coronas.  
 Hunc pietas niueis vexit super æthera pennis  
 Adscripsitque polo Diuum, atque audire precantes,  
 Et damnare dedit votis, cui thura vaporant  
 Vndique, & accensi lucent altaribus ignes.  
 Ast illi, quem tu numerato nomine Princeps  
 Proximus insequeris; moderatæ gloria vitæ  
 Inque suos bonitas, æternâ viuere famâ  
 Præbuit, & lenem populis audire parentem.  
 Hæc & plura Themis Regi, dein vota precisque  
 Effudit cælo, factoque hîc fine quieuit.  
 At procerum iurata cohors iter omne remensa est  
 Ad Luparâ, & patriæ L O D O I C Y M reddidit aula.

INAVGVATIO

Quattuor hîc totos meditantem ex ordine menses  
 Vidimus, & doctâ tingentem pectora lymphâ  
 Sub Phœnice suo, qui quæ sapientia Graiûm,  
 Quæ Romanorum fuerit, quæ principis artes  
 Edocet: vt decorent imitantem numina Regem  
 Compositi mores, vt turpe cupidine vinci,  
 Transuersumque rapi violentæ fluctibus iræ,  
 Nec subitis lentos affectibus addere frænos.  
 Præterea referat Naturæ arcana latentis,  
 Quæque vel immenso tellus animalia tractu  
 Educat, æquoreóve natant in gurgite monstra,  
 Quicquid serpit humi, aut leuibus secat aëra pennis,  
 Et quos cuique dedit generi Pater optimus vsus,  
 Ingeniumque feris mirabile, pluribus atrum  
 Virus inest, aliæ dociles mansuescere cultu.  
 Interdum herbarum curantes vulnere succos  
 Narrat, vt inuentum Cretæa mater in Ida,  
 Quem tulit Æneæ florem, dum saucius armis  
 Abstinet, & sæuâ confixus crura sagittâ  
 Nequicquam medicas implorat Apollinis artes.  
 Quàmque, coloratos penetrat dum victor ad Indos  
 Vidit Alexander radicem nocte sopora,  
 Ictâ venenatis sanantem corpora telis.  
 Pascitur his animum LODOICVS, & altiùs ora  
 Indè ferens, vasti fulgentia mœnia mundi  
 Miratur, superisque audit quæ fœdera regnis,  
 Qui motus; celeres vt primus concitet orbis  
 Orbis in occasus, & stantia sydera secum  
 Torqueat, errantésque globo septemplice flammâ.  
 Rursus ab occasu reliqui nitantur in ortus  
 Motu quisque suo, primi motumque retardent  
 Orbis in aduersum, ne fors violentiùs actò

Cuncta rotet mundo , frigusve inamabile perdat  
Squallentes refugâ Solis vertigine terras.

Sic Pater omnipotens , vicibus qui temperat æquis  
Omnia, consuluit rebus, certisque mouendos  
Mentibus addixit radiati fornicis orbes.

Hæc Regis teneros animos si fortè fatigant  
Itur in annales , & longis edita fastis  
Tempora, tot veterum pugnas regumque ducumque ;  
Nec nisi in exemplis se Rex ingentibus ingens  
Inspicit, arma cupit , facilisque ad bella lacertos  
Ventilat , & patriâ iam se metitur in hastâ.

At Regina olli mater blanda oscula libans,  
Maecte animis Heros, inquit, sed prælia differ,  
Te tuâ sacra vocant, prisca tibi cuncta parantur  
Urbe Remi, te cælesti perfundet oliuo  
Regalemque sua signabit imagine frontem  
Æthereus genitor, cunctos qui numine reges  
Protegit, atque tuis adiungit robora sceptris.  
Fac modò lustratus venias, & pectora serues  
Pura Deo, noxæque omnes tibi rite pientur.  
Paret Rex dictis charæ Genitricis, & vrbe  
Digressus, magnâ procerum stipante cateruâ,  
Arua triumphanti curru subiecta peragrat,  
Perque suos latè populos, festasque per vrbes  
Inuehitur : quâ fert gressus, tepefacta repente  
Vernat humus, lætisque notant vestigia flores,  
Plenâque odorato spumat vindemia Baccho.  
Ipsa etiam, quamuis pronum Campania nescit  
Autumnum, atque nouis Regi se iactat aristis.  
Celsa Remi tandem peruentum ad mœnia, quò se  
Relligione patrum reges, & more vetusto  
Ferre solent, illicque noui primordia regni

I N A U G V R A T I O

Ducere, cœlesti augurio, sacrisque litatis.  
 Templum antiquum, ingens, incisas arte figuras  
 Dædala, & exsculpto simulacra nitentia saxo  
 Diuorum atque hominum foribus suspendit in altis,  
 Hospitibusque adeò primum spectacula pandit  
 Vestibulum, & toto mirantes detinet arcu.

Iamque dies aderat, quâ sacrum mittere rorem  
 Decretum superis, oleique ex æthere fusi  
 Vngere diuinis L O D O I C I tempora guttis.  
 Deduxere illum proceres, longoque decora  
 Ordine nobilitas, quicquid mirabile Phæbus  
 Usque repercussis veniens despectat ab undis,  
 Insignes quoscunque sinu fert Gallica tellus  
 Aut proavis aut Marte viros, solennia tanta  
 Adglomerant, vnâque tegunt testudine templi.  
 Fœlix illa dies, pariter mortalibus vna  
 Et Superis hæc cura fuit, tibi, Gallia, Regem  
 Ornare, atque tuis oculos aduertere rebus.

Iam roseo Rex ore nitens, accesserat aram  
 Virginis, intactus pluuiæ flos qualis & Austro;  
 Gramineis cum manè recens aperitur in hortis,  
 Quem neque delapsæ turbarint arbore frondes,  
 Non vaga lasciua decusserit vngue puella,  
 Non apis expansis volitans insederit alis.  
 Integra virgineo stabat Reuerentia vultu,  
 Quæq; verecundi proles incedit Honoris  
 Maestas. hunc non cessantem in vota precésq;  
 Et genitrix Virgo, pater & L O D O I C V S ab astris  
 Desuper adspectant: meritis adit illa Tonantem,  
 Hic precibus: Virgo sed talibus occupat. ô qui  
 Aeternis regis imperijs mortalia, cerne  
 Gallorum nostras quantus conuentus ad aras,



Quæ pietas genti, quanta Rex indole surgit  
 Innocuus, casto suffusus vt ora rubore  
 Induitur sacrâ puerilia tempora vittâ,  
 E' que meâ supplex patrium capit æde tiaram,  
 Huic tu, si quis amor, cœlestia munera funde,  
 Si quis adhuc nostris precibus locus, annue felix  
 Imperium, & longos mansuro stamine fusos  
 Ire iube Parcis: extremum hoc muneris esto  
 Dilectæ ( quando hoc dignaris nomine ) matri.  
 Omnipotens contrâ. nam quid tibi, chara, negarim  
 Mater, ait? sed quod tantis ambagibus oras,  
 Sponte dedi: Gallis fœlicia currere fata  
 Edixi, & placidum sceptris assurgere Regem.  
 Huic quoque cœlestes, ad sacra altaria, nimbos  
 Desuper infundam, atque vni, pluet imbri sereno.  
 Dixerat hæc. lato discedit limite cælum  
 Protinus, & largâ rorant aspergine nubes  
 In caput inque humeros Regis, completur odore  
 Omnis eum circum locus, atque halantia fragrant  
 Tempa procul: lætus medijs auditur in astris  
 Conventus superûm: & flammati regia cœli  
 Defensis agitat communia gaudia terris.  
 Tum quoque sydereis è sedibus aduolat Ales  
 Mortales fallens oculos, Regique coronam  
 Imponit, rursus mox sese librat aperto  
 Æthere, & ingenti percurrit inania flammâ.

F I N I S.

ILLVSTRISSIMO CARDINALI

Εὐχριστόν.



CVI Romulei septeno vertice colles  
Assurgunt, nec habent sæcula no-  
stra parem, (re limen,  
Hæc æui mihi prima dies, quæ tange-  
Et tua mirari cominus ora dedit,  
Pagina cum docti trepidans penetrare subibat  
Principis, vt Clario vota tabella Deo,  
Non ego sperabam tantæ præconia vocis  
Improbis, aut sacræ munera tanta manus.  
Ne, Petrarcha, tibi veteres iactentur honores,  
Et Capitolino lecta corona iugo,  
Plus tulimus: nostros diuino DAVIVS ore  
Perlêgit versus, quid magis esse potest?  
Principe quòdque simul mirêre & Apolline di-  
Laurea decernens, aurea ferta dedit. (gnum,



### Extrait du Priuilege.

**P**AR Lettres patentes du Roy données à Paris  
 le 8. de Nouembre M. DC. X. signées, Par le  
 Roy en son Conseil, PERROT, & seellées du  
 grand seel en cire jaune sur simple queuë : Il est  
 permis à Robert Estienne & Pierre Cheualier  
 Imprimeur & Libraire iuré à Paris, d'imprimer,  
 ou faire imprimer, vendre & distribuer vn Poëme  
 Latin intitulé, Inauguratio LVDOVICI XIII.  
 Galliarum & Nauarræ Regis Christianif-  
 simi, & tous les autres Poëmes Grecs & Latins  
 de N. Borbonius, & les traductions cy-deuant  
 faiçtes, ou qui se feront cy-apres d'iceux : Avec  
 deffenses à tous Imprimeurs & Libraires d'im-  
 primer ou faire imprimer, vendre & distribuer  
 lesdits Poëmes Grecs & Latins, ou leurs tradu-  
 ctions, ny en extraire aucune chose, ou les vendre  
 imprimez ailleurs, iusques au terme de six ans  
 accomplis. Sur peine de mille liures d'amende, &  
 de confiscation des exemplaires.









